

四庫全書

子部

# 欽定四庫全書

子部

六藝之一錄卷三百九十四至  
六

詳校官中書<sub>臣陸</sub>湘

貢外郎<sub>臣</sub>牛稔文覆勘

總校官檢討<sub>臣</sub>何思鈞

校對官中書<sub>臣</sub>陸湘

謄錄監生<sub>臣</sub>王宮

欽定四庫全書

六藝之一錄卷三百九十四

錢唐倪濤撰

歷朝書譜八十四

宋賢墨蹟

呂寶臣子安學問帖

行書紙本

子安學問博瞻材智深遠豈能久困常選方朝廷搜揚  
俊異用特立之士何必借譽平常之流公躬再拜

韓魏公小懇帖

琦再拜啟琦有小懇容易干聒台聽琦向者自并易相  
事簡公暇因闕後圃起一堂名曰晝錦蓋取古人榮守  
本邦之義時杜正獻公以降往往有詩以光賁之已而  
被召歸闕常欲求公文百十字以記之為鄴中不朽之  
事拜接幾十年卒蓄縮不敢措一語今守相趙元甫知  
琦欲有求於公遂能用心獲一美石磨礱已就且有書  
見督云早丐公文至則便可鐫石琦以此不自量度輒  
以誠請公若憐而許之不獨夸耀閭里誠獲託公文遂

為無窮之傳矣如曰未可幸恕妄作皇恐皇恐謹奉手  
啟上聞不宣琦再拜啟

韓魏公信宿帖

琦載拜啟信宿不奉儀色共惟興寢百順琦前者輒以  
畫錦堂記容易上干退而自謂眇末之事不當仰煩大  
筆方夙夜愧悔若無所處而公遽以記文為示雄辭濬  
發譬夫江河之決奔騰放肆勢不可禦從而視者徒聳  
駭奪魄烏能測其淺深哉但褒假太過非愚不肖之所

勝遂傳布之大恐為白圭之玷此又捧讀慙懼而不能  
自安也其在感著未易言悉謹奉手啓叙謝不宣琦再  
拜啓叅政侍郎台坐

朱文公跋一則見前

曾子固局事多暇帖

行楷書

局事多暇動履褻福去遠誨諭之益忽忽三載之久跼  
處窮微日迷汨於吏職之冗固豈有樂意耶去受代之  
期雖幸密邇而替人寂然未聞亦旦夕望望果能遂逃

曠弛實自賢者之力夏秋之交道出府下因以致謝左  
右庶竟萬一餘與順序珍重前即召擢偶便專此上問  
不宣輦再拜運勾奉議無黨鄉賢二十七日謹啓

曾湘潭五十郎帖

五十郎人來得書甚慰遠念即日同汝母五十七已下  
一一安樂此中如常諸不復道知漸習舉業甚好莫須  
入州學否且更勉勵自立不可更作少時可悔事也五  
十七等脩學有次第否各須勤學不可因循有文字寄

來看此外與汝母各好將息陳郎四十八今在何處已  
到官未因書言來人回草草五月四日啟付五十郎甫  
伯仲宰上

曾子宣被召帖

布啟被召經途特辱垂訪迫於行役不及謁謝幸與財  
恕乍遠保愛為祝聊奉啟代面叙不宣布手啟上徐君  
茂材足下

曾子宣與宋親帖



布叩頭為別滋久良以馳想每辱書示審近況佳福兼  
承旦夕遂還侍下趣裝諒亦勞止新塗去此不遠因風  
頻惠問為佳爾未相見間多愛五娘子不日離家想離  
戀不易更宜寬中加愛六姪已下一一同此伸意為煩  
惱中未及子細不討不悉布叩頭宋親茂材

曾子開奉別行復帖

肇奉別行履歲暮傾鄉實倍常情但公私紛紛為問不  
數甚自媿也別紙叮嚀豈惟益友忠告之誼亦出於憂

國懇懇之誠反復數四不勝感嘆衰拙於此豈能忽然  
但再三則瀆終恐無補爾餘非會面不究所懷遠書萬  
一流落不可不慮也海陵過此相見誠如所諭所諭廣  
陵之傳廼郎吏誤報乘流得坎任其自然未嘗以此為  
念上下匱乏所在皆爾非獨彼也歲晚益寒強食自愛  
為祝肇又上

曾子開造門帖

肇頓首啓比獲造門幸承餘教繼蒙手筆感服并深稍

間即參候謹因還使上啟伸謝不宣肇頓首再拜給事  
閣下

魯子開五十郎帖

五十郎久不得書計侍二十嫂同諸弟各安此中如常  
不知汝已納婦否必不輟講學為文有新文詩寄來看  
此外且須倍自謹慎每事三思不可因循自肆取誚鄉  
里也愛汝至切故及此言能相聽否餘惟與諸弟多愛  
晉晉行者脩學必漸成立更且勤學蠻哥亦計長進郡

君傳語甘郎已下更不別書各好將息為祝陳家四十  
八娘必常得書計安計安二月五日啓咨 三十郎頗  
自成否且更勉之

曾子開近疎帖

肇近疎聞問方深企想辱書甚以為慰訊後安否何如  
衰繭比幸安完他不復道閒居講學想甚自得尚阻披  
見千萬厚愛草草不悉肇手啟宋親茂材

曾公卷草履帖

草書紙本

紆以道半雨淖狼狽之甚欲煩左右置草履以濟兵卒  
漫照公文去幸留念今晚恐不可行來日相見紆再拜  
久直知縣七哥借一二十人來相接左言

右曾氏諸帖有李璧衛涇徐誼王

缺

趙汝談董居

誼劉辰翁陳黃裳曾招子九跋見前

曾公道夫出示先世手澤歛衽拜觀之餘敬題二小  
詩嘉定壬午下元日里人聶子述 香辦平生滿意  
熏更叅曲阜問迷津只疑黃閣官尊貴不敢近前丞

相嗔 一門翰墨森圭壁諸老題許祭錦花珍重雲  
仍好收拾夜虹貫月定君家 廣賢會堂賓出示先  
世手墨敬題廿八字滕斌 西風吹老髻根霜幾度  
青山送夕陽回首淵明今已矣黃花猶帶晉時香  
前人手澤滿脩椽歲月無多已棄捐誰似文安遺帖  
在至今珍襲作家傳 片言流落總吾師策藁諄諄  
妙救時但恨故家三四紙起人無限後來思 大德  
丁未六月望盱眙周端禮

南豐而後艇齋君忠義詞章萃一門手澤流芳凌劫  
火欽承猶得到來孫 大德丁未立冬日前宮講陳  
隨隱拜題

趙清獻山藥帖

行楷書紙本

抃啓辱誨示以南都山藥分惠曷勝珍感介還布謝崖  
畧不宣抃頓首知郡公明大夫坐前即刻 海柑四十  
顆容易為獻皇恐皇恐

孫之翰虞候還帖

行書紙本

甫啟虞候還附手啟必已呈左右節級歸又辱啟誨承  
即日體況休豫深以為慰舟舫極荷應副已差人申取  
亦欲完葺也有所教令時惠音餘惟順時自重以俟迅  
擢不宣甫手啟子溫運判屯田同年侍史三月廿六日  
謹空

司馬溫公兩淮帖

行書紙本

光再覆伏自兵興兩淮幾為棄地朝廷雖欲漸謀經理  
而兵食闕然未易倉卒辦也餘俟後訊詳具伏乞照知



光再拜

文潞公祠部帖

彥博頓首祠部同年近累得良翰深荷勤意審美轉伏  
惟歡會未涯披對春中萬萬愛重彥博頓首 靜萬已  
至且令模書必應過夏

呂維仲私門帖

行書紙本

大防頓首私門不幸息女喪亡伏蒙台慈特賜手問仰  
荷軫恤無任悲感末由面謝哀咽奉啟不次大防頓首

尚書右丞台坐

蒲傳正夏中蒲兵帖

宗孟頓首夏中蒲兵還辱榮翰遙懷德誼無時暫忘秋  
高氣清想維邇日視履均勝南北遼邈江河阻修引領  
話言實勞鑒寐初寒惟冀倍萬珍衛手削草率不宣宗  
孟頓首知府鈴轄子中待制十二日

唐林夫征局冗坐帖

行書紙本

垌啟征局冗坐忽辱珍翰意快目明殊增欣感昨日紙

再納一番朝夕躬請左右次不宣垌再拜彥遠尊兄侍

史 午刻

韓子華家食帖

行楷書

絳啟屢承見顧皆失迎候豈勝愧悚來早攀請家食幸  
希垂訪庶少接清論也餘不皇悉絳祇啟節推同年二

十六日

韓繹瞻懷帖

行書

繹頓首再拜留守司徒侍中繹瞻懷館下馳情旦暮昨

以承乏牽冗久疎左右之間悚忤至深冬仲嚴寒伏惟  
台候動止萬福區區鄉往未繇言侍仰覬保調寢味下  
情之望謹奉啟不宣繹惶恐啟上留守相公司徒侍中  
台坐十一月一日謹空

韓玉汝欽聞帖

行書

續欽聞制命深副願言屬此守藩莫遑脩慶嚮風馳想  
言叙奚殫續又上

錢穆父跋先起居帖

行書

先起居贈開府儀同三司司空一帖先叔父脩懿尚書  
儀同十八帖已上元祐庚午十二月知軍州事總因移  
高陽安撫使辭墳遂命裝褫付沈氏以防遺墜云

蔣頴叔辱書帖

行草

之奇啟辱書承比來體履佳愈遠宦枹罕想難於行計  
也往使陝右乃所嘗到一味只有缺人與兵馬便可以  
習帥才也呵呵承國門嘗見訪非諭及則不知也方暄  
自愛不宣之奇頴首 彥和河洲司戶二月二十日

蔣頴叔北客帖

行書

之奇頴首啟改朔伏惟台候萬福北客少留方此甚熱  
又房室隘窄良不易處亦聞小苦痔疾更乞調飲食將  
息為佳久闊不展深以想念也謹馳啟上問不宣之奇  
頴首再拜脩史承旨侍讀台坐

章子厚會稽尊候帖

行書

會稽尊候萬福承待次維揚想必迎侍過浙中也宜興  
度應留旬日二十間必於姑蘇奉見矣冀盡從容惇

別紙

呂望之蒙恩進職帖

行書

嘉問衰晚無堪蒙恩進職易郡悉出交游延譽之賜將何補報有媿而已辱誨示副以慶函禮意之厚益重慚畏嘉問至青社累月乍脫東南之劇就一州之安良以為幸但未知晤語之日馳情惓惓嘉問再拜

林子中奉見風範帖

希再拜前此四年嘗於武林奉見風範然一往來之間

未及深接嘉誼而心所傾嚮固亦異於此矣垂隔以來  
不審侍下福履何似希聞居吳門相望才數舍未緣前  
見徒切瞻跂輒奉手狀通問幸恕崖略不宣長樂林希  
再拜劉君秘書文几二月十三日手狀

王逸老杜門帖

草書

升再拜衰老杜門多病久不承興居之問日益系詠近  
魏端叔見臨能道動止之詳用以為尉累蒙見許一過  
樊圃竟不聞足音因出切幸迂臨至望升再拜



劉德初又啟帖

行書

正夫頓首又啟遠辱手翰得聞佳履殊用慰感正夫乍至都下公私擾忞叙布草略惟亮幸甚他冀珍賚以需褒除正夫頓首

陳瑩中仲冬嚴寒帖

行書

璿啟仲冬嚴寒伏惟尊候萬福璿蒙恩遷叙兩官昨日祇受聖恩深厚無以論報拜命感涕而已五八娘已成親十娘在後月恐知之七八行謹此上問餘乞保重不

備璫拜上思濟使君大夫十三姐縣君十一月二十二日

薛道祖晴和帖

紹彭啟兩日途中不得少欸為歉晴和想起居住安二畫久假上還希檢收許借承晏張遇墨希示一觀千萬承晏若得真完雖異熱帖亦可易更俟續布不具紹彭再拜大年太守執事二十八日

薛道祖二像帖

紹彭啟早來蒙教多荷借示二像甚佳得觀多幸雜畫  
更借數種所喻智永曇林二書於左右不悵但不欲雪  
山佗畫皆可也紹彭頓首大年防禦執事 雪山非不  
佳但苦太大軸耳

薛道祖隨事吟帖

紹彭啟寺中日昨領來教不及為報皇悚可知枉誨伏  
審經夕氣涼台候萬福隨事吟蒙借示多幸謹還納去  
劉二乃云有兩軸若并得一閱幸也古經紙若空得畫

贊小字三十行可耳古綾古絹亦求一閱羅有難書矣  
人還不一紹彭再拜大年太尉容三十行兩段亦可也  
元本自是兩段

右三帖有孟頫金應桂居仁三跋見前

薛道祖昨日帖

草書

昨日得米老書云欲來早率吾人過天寧素飯飯罷閱  
古書然後同訪彥昭想亦嘗奉聞左右也侵晨求見庶  
可偕行幸照察紹彭再拜

張芸叟姻期帖

舜民再啟姻期必嘗經度舜民以初二日次洛中自爾  
至初六日良吉又以一行兵冗不能久留欲於初六將  
財定併行并以是日納壻留在門下翌日遂行未審可  
否餘俟面質舜民頓首

陳仲脩歲晏帖

行書

師錫頓首歲晏伏承德履休嘉辱手畢霑餉名醪野人  
豈當厚賜仁者之粟懷惠為多餘面謝不一一師錫

頓首方迴監郡宣德執事

邵仲恭到京帖

鰲啟到京俗事區區遂不果頻上狀鄉往何可言秋暑  
尚爾不審迹成公外動靜何如鰲無狀承乏東排岸勉  
力祇職未緣聚會謹勒手啟候起居唯祈以時保衛不  
宣鰲再拜存道良親司理閣下

蔡元度雪意帖

草書

卞拜覆雪意殊濃畎畝大洽殊為可慶蒙賜答誨尤以

感慰適行首司呈賀雪笏記似未穩試為更定如可用  
即乞令寫上也不備卞拜覆四兄相公坐前

李端叔別紙帖

行書

之儀再啟伏讀別紙延予加重深畏非據頃自稍遠一  
向杜門時到田畝間與村老周旋外塊坐而已高誼素  
所景仰裹糧而趨固所欣願況近在數十里地邪便當  
撥置以圖傾盡不愚早晚可回聞其婦家已有代期何  
猶遷延也丁君聞好事鄙語書於質轉應副過煩獎予

皇恐皇恐叔黨定肯書否果得之足以借重也乍到過  
從必未間又端若將遠別得無應接稍勞否之儀再啟

何文績即辰六月帖

行書

臬拜覆姑夫都大提刑寶謨郎中姑姑令人即辰六月  
徂暑稼寶告登恭惟疊組輝華宸眷益赫尊候神贊動  
止萬福臬不振之蹤累侍所生啟門忍貧仰藉鴻  
休知感知自比嘗一再貢狀嗣以無謂弗敢溷籤史若  
詹依一枕則食息未始少替鄉間之梅霑足日來晴炎



泉流易涸目今更得甘霖一飽可指期矣江右擾擾聞  
已平戢威惠所孚固宜屏迹知縣表兄微恙已遂向安  
深切慶忭內除尊表安問如織兩院嬖恭人尊候曼福  
禁從之拜鄉里應有驅策伏聽嚴戒不備稟拜覆

趙德麟蒙餉梨栗帖

行書

令時頓首辱惠翰伏承久雨起居佳勝蒙餉梨栗愧荷  
比拜上恩賜茶分一餅可奉尊堂餘冀為時自愛不宣  
令時頓首仲儀兵曹宣教八月二十七日

李商老公闢家兄帖

公闢家兄得彼相從當甚歡也然亦以親老思北歸何時遂耶小妹子與諸孤幸此糊口粗安勿煩為念但念八長成未有親親三十已許與小子房弟十二子為婚須候念八了當方議之也令嗣去年相見或云尚未出京久不訪及諒當專人令來嫂所耳別紙示諭備悉來諭敢不在下懷耶未間千萬珍重彭頓首

愔初冬薄寒帖

愔頓首啓初冬薄寒伏惟衛生有經啓處褊福別來傾  
企不少置比奉書誨副以土珍良戢厚意愔比徙寓常  
熟閉居一動勞費滋甚乍到人事袞袞略此通訊自餘  
嗣布曉集均康令弟省幹美除有所向未宮拜并三意  
山邑有喻不外正寒惟千萬為器業厚護或有警悔片  
札付邸吏只附來常熟可也不罪不罪十月二十七日  
愔頓首再拜叔至省幹舍人契友

宋

缺

藏蔡蘇黃米四大家合卷內

黃山谷承諭帖

庭堅頓首承示諭數往助崇德姨母此蓋公孝友之素  
仕宦所得唯此而已其餘亦何足道耶願數顧省立則  
參於前在輿則倚於衡也庭堅頓首

米元章再啓觀使帖

芾頓首再啓觀使樞密太尉先生鈞席芾頓首再拜經  
宿恭唯台候萬福伏想般舟良勞神用俟到蕭閒參見  
次前蒙寵賜嚴命不許辭然今有所獻公亦何辭以拒

之通園願隨茸錦增光久為選人鈍滯非稱也若不以為洪願檢入謹奉啓不宣芾頓首再拜

宋濂吳寬張弼三跋見前

蘇子瞻官屬帖

汪珂玉藏宋名公翰墨合卷內

軾此間官屬中有游九思誠之自長沙邀來攝經幕其  
人有志趣曉民事亦嘗從元晦遊又有嚴昌裔慶曾永  
州人軾舊與之款慤實可委信又有李棕靜翁見為經  
屬雖才短頗氣直敢言此外又有兩三人頗習事自楚

來旁一行云武行中勇毅者極難得收拾得數輩其餘亦頗似肯向前亦未有

顯過者凡百姓教詔之甚而不悛然後不免治之耳諸郡守得人者寡例多苟且其間亦多闕向來三司共作一味是人情今與兩臺約請公是選不可一毫欺朝廷但却似目前難得到任後今已辟兩處口詣頗以為然也吳玠到遵州後彼中事殊覺血脈通貫見已攝守極通曉也李天亨規摹只是理會兵財兩事甚有條緒至今傳道之林君本政書未盡要其根本之論

得其家更有數書已往錄矣廣州農事尤減裂若今冬尚備數於此亦當考究料理也此間士人聞見極陋然資質寧無佳者軾再過學中與之講論經史學宮弊甚已修治增廣講堂之旁列前政生祠不免徙置佛寺用其處新濂溪二程先生祠庶來者知向方耳軾比領御筆理會買馬事既而軾奏聞又御筆批下依奏依奏往返自更遞其不甘日荷上不棄外應之如響軾凡有所見其敢不自竭况敢自有踈外耶其他可口者口

一二示免之軾再拜 偶有肘子納二十枚并川墨兩  
笏同寄軾又拜

按帖內有嘗從元晦遊又有新濂溪二程先生

祠又有御筆理會買馬事皆非東坡語或是南

宋人與東坡同名者此題作子瞻帖似誤

又按此帖

似是張南軒書南軒名杲想誤看邊傍故題作子瞻耳

在究海與青社密邇嘗得希文侍郎音問忽得詞閣  
下昆季動靜深在念也朝城三叔中舍嘗得書尺三叔



母去年十二月傾逝在遠官極孤寂也雄州四叔推官  
在官下無恙軾再拜

汪砢玉跋已載墨蹟詩詞類

朱忠禧藏宋賢十七劄子

宋公垂度支帖

綬頓首度支學士近奉宴言深慰勞客忽承手札曲示  
勤私貺及吳中碑本及藤帽茶一奩傷費頗多不敢辭  
拒但增醜佩之至謹因來价輒奉片幅為謝綬頓首四

日

葉道卿近遣帖

清臣啓近遣一幹隨府伉持書并錄覽二書同詣鈴下  
計已呈露數日前追胥自彼還辱手教歲不我與忽焉  
隆夏言念出處光景載環夷險均之政如宿昔天休蹈  
道深篤報上忠純樂職裕人無有內外顧為簡書所縛  
不得車騎相過此可恨耳生拙守退伏盍族尸滄閒齋  
晝眠後池晚飲惟性所適頗無羈牽長杜櫟之扶疎同

海鷗之放逸故人不為念也清臣頓首五月十八日

章子平承示帖

承示諭張恢者嚮以明公昆玉世契之厚待之以禮不謂全不循理切恐仰玷盛德亦欲小警大戒可以完其出處也諒惟深密公文如命頒下縣鎮矣衡竦息

林子中前日帖

希啓前日辱屈臨感刻感刻歸聖兄弟竝入開寶睿遂當獨牒奈何天清一室速治之開寶舍亦望令人諭主

僧且那與小子虞并一二親情同處也恐見令姪般出  
便據之也兼舉子紛然不可不先慮之也阻於面奉先  
此布一二希頓首完夫府判朝奉學士兄十四日

蔣穎叔遂往法濟帖

之奇啟知遂往法濟不勝依依長安酥二個葱雀鮓二  
罐水梨鳳樓梨各十枚小藥少許聊薦賓盤幸冀容納  
以鞠大獄不果拜違愴愴之懷不能勝述乍遠乞保重  
不備弟之奇再拜九兄知府郎中

口達七月帖

達啓辱七月五日賜教承已西上今想對還當有休嘉也秋暑未熄伏惟動止佳福達山間粗好兒女來歸已餘月老來如夢寐間耳未緣款晤千萬為國加愛為國加愛不宣達上頴叔知置大夫閣下八月六日

劉無言昨夕帖

燾再拜昨夕幸得侍坐早來廷中瞻望顏色不款奉告伏審晚刻尊候萬裕改月自當至左右適自局玉家親

賓紛然逮今未定旦夕專得面拜使還不備肅再拜五  
伯父大夫伯母縣君座前

口煜久踈帖

煜啓久踈修問秀州道中賢子見過傳雅誨極荷意愛  
之厚且承燕間多適氣宇泰然至慰至慰比欲詣邑圖  
一笑之樂屬治行迫窘惛賴不釋不克如願但向風快  
快無已劇寒唯以時自全保固壽福瞻禱瞻禱煜再拜  
致政太保大初兄執侍二日

葉石林人至帖

夢得叩頭人至辱教示審聞頓暄動止安健良深慰荷  
允幹極荷留念悚悚不知幾時定可還日遲面款入此  
月來淚皆頓昏痛作字艱強勉附報草草餘唯珍愛不  
次夢得叩頭季貢貢元親契

張天覺女夫帖

商英惶恐女夫王撫之蒙收錄八月七日已解商水任  
薦極餘溢遂可改京商英受賜與王氏均等會第二女

夫楊開還蜀輒令請見恐或下問河東北間事蓋楊生  
從商英者二年矣伏恐上知商英惶恐再拜

周美成前日帖

邦彥頓首啓前日特辱降顧間冷之中倍增感激負疴  
屏迹造謁不逮第深悚惕邦彥頓首啓

林彥振承誨帖

攄頓首啓比比承誨下情渴仰知數辱顧訪皆失迎對  
但深愧感蒙教伏審晚來尊候萬福峴刻已領蚤暮



當卜祇詣遽中馳此拜覆不宣攄再拜右司彥和尊兄  
座前

韓良臣近問帖

世忠咨目頓首啓運使直閣侍史近間言誼良勤懷向  
比辰春雨伏惟漕輓餘閒台候曼福少懇近得旨以本  
司官兵二月下旬以後券食錢未有准擬權於貴司兌  
撥應付已有公文奉聞今去支期不遠敢煩願旨速為  
兌撥錢三十萬贖告為嚴戒所屬星夜起發得二月中

旬內到軍前以濟急關候朝廷降到錢即便發還也千萬干浼悚仄未間自愛不宣世忠咨目頓首啓運使直閣侍史

吳傅朋門內帖

說拜問門內眷聚伏想長少均協多慶賢壻以未接識不及別狀孥累輩乘二巨艦轉江入淮旬頗遲遲今猶未至次第經由高沙兒輩若知良臣在彼必往請見大兒子近堂差泰州如皋監鹽偶得見關便來赴官朝夕

先過此相聚數日而後之任仲子調真州推官尚有年  
闕叔子嶽祠滿已一年半未得赴部同二季隨骨肉俱  
來賢嗣昆仲一一均福說再拜

吳居父伏自帖

琚伏自廿二日具稟報之後深慮旨揮未到勢不容留  
遂將牌印牒以次官權管姑作急難給假起發方登舟  
間忽領珍染寵示省劄如解倒懸感佩特達之意無以  
云喻即星夜前邁矣瞻望鈞光在邇茲得以略切自炳

照垢皇恐拜覆觀使開府相公尊兄鈞席

王穉登曹函光二跋見前

六藝之一錄卷三百九十四

欽定四庫全書

六藝之一錄卷三百九十五

錢唐倪濤撰

歷朝書譜八十五

宋賢墨蹟

啟札

沈必先高秋氣爽帖

與求頓首上子明知府侍郎親家台席高秋氣爽伏惟  
台候勝常與求屏居里社未有晤集之期千萬為國保  
重不宣與求頓首上子明知府侍郎親家台席

胡文定與信伯二帖

安國頓首頃在行闕奉所多教方欲再造問信已以罪  
行矣既渡湘水之西山居自省相望數千里無緣復通  
聲息懷思可量去此見報伏審賜對受知特寘瀛館豈  
特交遊之私慶也已辱書貺欣承校正多餘德履增福  
未期晤集切冀順時為此道自衛不宣安國頓首信伯  
學士執事

安國再啓一別三十年暮光既及而學未至回省初心

旦夕自愧每聞德譽想造養之益深也信伯既親見伊  
川丈人入其堂與責任亦不輕矣使斯道遂行邪說不  
得汨之也直有望於君勉之安國再啓

胡文定稍踈奉問帖

行書

安國頓首稍踈奉問但企仰不忘爾辱教伏承尊履之休  
良用感慰郡久缺雨今日方得少雨不審治下何如劬農  
之仁所留意者故以奉問也安國此猶自如未有占對之  
日幸為人自重不宣安國再拜伯高太博尊兄閣下

呂元直台眷均福帖

行書紅粉牋本

顧浩再拜台眷均福承奉郎權富陽縣徐端義乃舊同  
官之弟前為富陽丞諸司嘗奏乞知本縣會諸使屢更  
易辟不成邑人頗安之幸為檢會案牘再為奏乞庶惠  
及百里也顧浩再拜

李伯紀近被詔書帖

行書

綱再拜近被御筆詔書以向條具邊防利害特加見諭  
上恩隆厚何以克當孤危之跡去國十年間關險阻無



所不至拳拳孤忠今乃見察第深感泣今錄詔書并謝  
表劄子去恐不知也綱衰病日加不復堪為世用然靜  
而謀之則有暇矣近於所寓僧舍之側葺小圃蒔花種  
藥為經行遊息之戲作上梁文及圃中十二詠輒以拜  
呈如得妙句為林下之光幸甚幸甚綱再拜

劉平叔即辰秋思帖

行書

光世咨目頓首啟上知府侍郎台座即辰秋思寢肅伏  
惟撫字之暇神贊忠嘉台候動止萬福光世駐軍淮右

未緣詹晤伏冀惠時為國保畚前膺異拜不宣光世咨  
目頓首啓上知府侍郎台座

尹和靖前月帖

煇頓首啓前月特蒙寵顧以病軀不得款奉教益為恨  
繼辱賜書併錄示定夫所撰其叔父墓銘顯道書先生  
易傳後捧領披讀感愧之心有不勝言專使至承惠翰  
荷眷予不怠甚幸甚幸煇即此遠依庥庇諸事粗遣腰  
痛亦減七八不煩過慮曾憲來寓虎邱日獲相見或云

可居旬日車馬聞欲來此遂得款聽益論未問尚冀為  
斯文自重懇切懇切使還專奉啓起居兼謝下情不周  
惇頓首再拜

尹和靖易傳帖

錄示易傳差互且據惇所收本寫呈乞檢至更望訂其  
是非他俟面議惇再拜

尹和靖虎邱帖

惇再拜啓向寓虎邱時蒙寵顧極荷眷予之勤去秋過

高隱辱館待至厚拜別之久日益瞻仰遠承惠問獲聞  
動靜感慰兼集即日大暑伏惟尊體萬福煇去年冬末  
來會稽凡事安集不敢有煩遠念末由拜會惟乞為斯  
文倍加保重以副願望真切謹專附手啟上問不周煇  
頓首再拜六月二十四日謹空

尹和靖會稽帖

煇再啟自至會稽以退閒不修講人事不遇使人故久  
不得上問必能深察向承教論語二事今已改正或更

有未定處有的便無惜貶諭朋友切磨之道廢而不講  
正賴吾信伯也萬萬留念顥望顥望貴眷各叶吉慶時  
暑以保愛為祝小姪塤已受恩三月得岳祠亦薄有祿  
廩僥倖倖亦恐知之煇再拜

尹和靖教益帖

煇頓首啓拜違教益兩見改歲瞻仰之心與日增積仲  
夏謹時伏惟贊畫之暇尊體萬福煇守拙碌碌隨分而  
已然則平日所聞不敢不尊衰老日甚幸未昏憤不煩

過念未由拜會敢冀順時保重前需召除以副友執之  
願謹專附狀起居不周煇頓首再拜信伯通守學士賢  
友執事五月十六日謹空

尹和靖兩收帖

煇再啓近兩收所惠教墨獲聞動靜感慰兼至過荷不  
忘甚幸甚幸常州往來衝要應接不能不少勞神用在  
信伯處之必不廢力有暇進道否有學者來講此道否  
必不倦以告也塊居僻寺向風不勝馳情煇再拜 貴

眷各惟上下安裕夏暑敢以保愛為請煇上問賤累特  
蒙問念感愧之至煇再拜

尹和靖久造帖

煇頓首拜啓久違益論日增瞻仰專使至特辱貶教伏  
審即日按察之暇尊體萬福感慰兼集煇居此甚安諸  
事粗遣不敢煩念慮未有拜會之期向風馳情秋暑尚  
炎伏乞順時保重前需大來以副願望下情豈勝拳拳  
使還謹奉狀起居兼謝不周煇頓首再拜信伯通守學

士友舊執事八月上澣日謹空

尹和靖邢堦帖

惇再拜啓邢堦以日到府中不敢草率上狀小姪塽近已娶婦只此中人家老拙又且了此一事伏恐知之皆辱流問荷眷與復拜起居禮惇再拜上

尹和靖主簿帖

時主簿紫芝到任未久不通問陳齊之今赴官未嘗通訊否或訪我存亡盡為告之惇又拜



尹和靖貴眷帖

煇再拜貴眷各叶吉慶敢以保愛為禱煇上問

汪懋跋一則見前

蘇後湖二帖

門中伏候萬福妻子俱拜起居之禮必恭已行否或面  
留告道區區之意山中雖荒索然歸金壇亦便道也儻  
蒙肯賜屈辱不勝至幸庠再拜

庠再拜上問尊夫人共惟壽體益康寧門中上下均休

老媳婦輩敢拜起居山中有委萬萬疏示庠再拜

徐詡李壽臣宋黻蘇嶠陳稚五跋見前

范景圭一舟帖

行書黃粉箋

適聞有一舟自北來未入門已遣介催促前來稍堪即  
押往閘頭候使艤之騰移也乞悉州中諸幕各有差朱  
簽謁告獨當勘事勞可知也修答草草幸深照其愚悚  
愚悚潔啓

范景圭春澤帖

行書黃粉箋

春澤可喜今有豐年之望也陵事想煩經畫裁費之外必易應副子細孫兄去可悉談也

徐商老久不上訊帖

行書

莘頓首區區久不上訊企想不勝前日逋中蒙問伏審公暇履用安裕數日前得勅合部尚未知各在舊治所還會於北都矣子正已自申陳恐已得明文及其他處置行遣竝乞示諭但恐廨舍不足當煩為慮久此孤陋再獲款炙喜可知也未間切冀保重不宣莘啟上安國

贊善閣下廿日新樂縣燈下

趙元鎮劄子

楷書

鼎以罪名至重不敢復當郡寄尋具奏陳未賜俞允區  
區之私不免再陳悃悃伏望鈞慈曲賜贊助俾遂所請  
實荷終始之賜鼎方在罪籍不敢時以書至行闕併幸  
憐察 右謹具呈伏候鈞旨八月日特進知泉州軍州  
事趙鼎劄子

韓忠武王秋暑尚煩帖

行楷書

世忠咨目再拜啓總領少卿台座近專遣人上狀諒已  
得達聽瑩秋暑尚煩伏惟神相公忠台候萬福世忠濫  
叨政務無補於朝尚阻良晤切冀仰副眷倚以時珍厚  
謹上狀不宣世忠咨目再拜啓總領少卿台座

韓忠武高義帖

世忠再拜日者事緒種種每荷周全自非高義何以及  
此世忠近以私家錢物悉進朝廷復得聖旨令世忠般  
取縷細專遣人拜聞諒已垂念若更蒙顧旨早與發遣

乃出厚賜也疊有干瀾悚仄之劇世忠再拜

汪彥章違別滋久帖

行書

藻咨目頓首再拜上啓太虛判院朝議台座違別滋久  
瞻仰殊深忽辱貽教從審即日秋杪氣肅神明攸相台  
候動止萬福且感且尉正值參觀敢覬精調茵鼎前膺  
殊渥謹奉狀布復不宣藻咨目頓首再拜上啓太虛判  
院朝議台座

汪彥章誤食胡桃帖

去年得下血疾半年有餘今春誤食胡桃能下血則知胡桃當忌也汪藻彥章

吳傅朋叙慰帖

行楷書

說頓首上啓區區叙慰已具右疏即日凝凜不審孝履何似末由一造廬次唯冀節抑哀苦以承家世寄托之重不勝至望謹奉啓不宣說頓首上啓大孝宣教苦次

張橫浦宮祠帖

行書

九成再拜聞宮祠已滿且復有瘡瘍之苦計今已安平

三八哥得書四一哥遂有一男子可喜可喜想見其室  
中亦自此無事矣諸令弟讀書不輟尤用慰懌范蘭止  
以武舉得官不聞其能文也去歲能賦者乃向來對門  
居程逖耳范亦可往來一見自知其人矣九成再拜

朱希真別後塵勞帖

行草書

敦儒再拜別後塵勞都不果寓書亦寂不蒙寄聲第勤  
尚想比日想諸况安適向者李西臺書久塵文府乞付  
示久不見此書日夜夢想告密封付此兵回也必不以



煎迫為罪媿悚媿悚偶作書多不能覩縷何日得相從  
於黃岡懷玉間臨書神馳敦儒再拜

張彥正乞授封號劄子

行楷書

綱比以小兒堅乞回授封號事上干鈞聽方懼冒浼乃  
蒙特為開陳俯從所請非參政留念之力何以得此舉  
室榮感不可言堅以宮祠任滿束裝造朝已令申乞呼  
召面列謝悃儻辱與進略賜提耳之誨使晚學小生得  
所矜式幸甚幸甚 右謹具呈資正殿學士左大中太

夫致仕張綱劄子

張魏公遠辱手翰帖

行書

浚再啓遠辱手翰良佩勤厚治郡無補丐祠蒙允荷上  
厚恩錫以異教方具牢辭未知所報行李已出城謀為  
湖湘寓居之計筆脯為況慰慰感感益遠會集唯祈加  
衛浚再啓

張魏公談笑措置帖

行書

浚再拜虔賊陸梁出于州郡養成端倪漸以滋蔓左右

談笑措置招撫勦除愜當事會朝廷倚重巨鎮一聽規  
謀切望頤旨早為之所庶民獲安居為惠甚大僭率僭  
率浚再拜

張魏公即日小雨帖

行書

浚咨目頓首再拜即日小雨作寒伏惟機政之暇釣候  
起止萬福區區已次丹陽張期以今日相會岳過太平  
數日之間事可決也惟錢糧邈然无涯戶帖州縣皆不  
敢催督尚觀望改易耳將如之何早夜思之任今日之

責者誠難內有輕舉之謗

闕教字

歛之責終不若前時居

廟堂者偷安寡悔之為愈也然則國家大計又將如何  
況吾儕被上厚恩且天下所責望乎凡有可致力者更  
冀默運於內切祝切祝常州許筆甚佳但毫極難得已  
令計置餘為天下自愛不宣浚咨目頓首再拜元鎮承  
相老兄鈞座二十八日早謹空

張魏公早上封示帖

浚頓首再拜今日早上封示彬父回御前遞論事劄子

聖意喜甚偉哉深切著明之論也今士大夫才識學皆不到而又重于為己輕於謀國尚烏足與圖事哉幸公留意川陝上流近事及人才之可用事機之可為措置之可行者歸以告上至望二十日午不宣浚頓首再拜  
彬父制置尚書友契台坐

張于湖關徹帖

行書

孝祥拜覆適一再具書當既關徹即日恭惟尊候萬福  
孝祥少懇趙不疚

張

慰既出門下極深感激聞以未獲

劫賊差人督捕此固當然但閱日已久賊終未可盡獲  
欲告且與追還使臣者渠當日夜究心期於必獲也僭  
易皇恐之極謹拜覆不備孝祥拜覆姨夫判府留守待  
制侍郎台座

張于湖學富帖

孝祥頓首再拜左右以何時來涇川官居諸況佳否學  
富識明進益不已州縣渠能淹久耶臺閣須才會薦  
者孝祥頓首再拜

張于湖臨存帖

行書絳色紙本

孝祥昨者過辱臨存仰佩敦篤之眷不勝感著之極畏暑如焚恭惟神相行李台候萬福孝祥無緣往見益以愧負馳此少致謝悃 右謹具呈應辰提幹校書年契兄六月六日年弟張孝祥劄子

張于湖歲晏苦寒帖

行書

孝祥伏以歲晏苦寒即日恭惟提舉宗丞持節觀風有相賢業台候動止萬福孝祥鹿鹿如昨不足言者何當

再晤臨紙馳鄉願言以時節宣愛身為國即須名用  
右謹具呈提舉宗丞季羔尊兄十二月八日左承議郎  
充集英殿修撰知平江府張孝祥劄子

龍大淵歲華帖

行楷書

大淵竊以歲華將暮寒威益凜伏惟戎政多暇神介靖  
共台候動止萬福大淵即有承顏接詞之便預增欣躍  
謹再奉手訥上詞興居兼謝來貺 右謹具呈十二月  
朔日昭慶軍承宣使知閤門事兩淮撫諭龍大淵劄子



王瞻叔即日薄寒帖

之望頓首再拜季思通判學士尊親台座即日薄寒伏  
惟台候萬福帥司差體量賊事想又一出今必已了可  
作一書與李承宣懇渠或恐奏功薄霑賞典也漆器見  
買近得十五哥書報浙東早禾大熟秋間亦旱所諭戍  
兵六月間作劄子稟廟堂七月間劄下田侯施行李侯  
已差百人於桂陽二百人屯郴矣得此想可奠枕也大  
軍幾時回應辦亦良勞也未間保重不宣之望頓首再

拜季思通判學士尊親台座 九嬪以次均休百一哥  
妹方進茂老妻兒女比問有妾無外服餌藥須面見方  
傳

洪景嚴睽違許時帖

遵頓首再拜睽遠許時可量向仰之悰里居屏迹不值  
端便咫尺之間無從而前專使伏枉教賜累楮周諄尉  
感無已涇川胝章既久緬計實惠敷施彼民何幸來論  
迺欲奉祠何耶未即再晤伏幾密練裒對新渥至扣遵

頓首再拜

虞雍公釣堂帖

釣堂仙集伏惟福本崇大竊聞有長子之戚盛德積善之門豈應有此天道似不可詰矣然去來修短皆前定釣堂露電世法具大定力自有以處此夢符制幹兄榮改事有涯此心望望甚久今得報而喜不啻其身之得也漢上相處甚樂前此每許為允文留別當具稟次家信一封謹封納伏乞釣照允文皇恐上覆

吳寬跋一則見前

虞雍公適造帖

行書

允文適造見尋辱訪別樂處既久數千里分攜可量此  
心愴惻也蜀墨二種久所祕愛春秋纂例武侯將苑二  
書文與可石竹大圖軸皆蜀善本連二麥光牋鹿角膠  
霜餅子併以為故人壽入夜倉卒微甚有愧幸收其意  
也來旦發舟不甚蚤否為修名自閔不勝再三之懇

右謹具呈九月二十八日允文劄子

丞相手澤得之于黃舜臣先生家藏時至正二十五年七月六日也嗣孫堪謹識

葉夢錫即日初冬帖

行書

衡悚息啓縣尉奉議即日初冬薄寒伏惟警捕有相履用多福未緣晤見切冀惠令節宣倚須超擢不宣衡悚息啓縣尉奉議侍史

汪聖錫中庸畢工帖

應辰頓首再拜被

闕數字

審早上起居住佳安小保詳納去

期集明日未能辦須再展昨見許公執云須待中庸畢  
工方可期集及見梁師乃云中庸畢工當在後月初間  
局中錢物不足決不可候其期容面稟丞相理會却相  
聞也不宣應辰頓首再拜子東學士丈

胡邦衡台慈分賜劄子

楷書

銓伏蒙台慈分賜細肋上樽敢不跪受然顏有覲矣朝  
夕奉詣硯廬以謝伏幸台照 右謹具呈宮使中書舍  
人台座正月望日左奉議郎賜紫魚袋胡銓劄子

曾純甫惠誨帖

行書

觀啓惠誨喜聞朝寒萬福踐長重蒙問餽之及拜況銘  
荷謹上狀不宣觀啓上子發承事

曾純甫楓橋帖

行書

觀啓楓橋宰堵在望中念欲重詣久不克被誨存喜聆  
清適舟車北來道俗之譽藹然信名下無虛士也不宣  
觀啓上溫老

王梅溪寵示室銘帖

十朋伏蒙寵示室銘題跋并和詩三復欽嘆詩詞意俱  
工但過情之譽非所敢當耳銘跋高深微妙然有所未  
諭者不欺二字豈晚學無力量之人所敢擬議以是名  
室自知得罪竊效古人坐右銘聊以自警云爾張丞相  
以合天人為不欺深得中庸謹獨論語一貫之旨其說  
非不廣大其為訓戒也亦深且至矣而高見以為未廣  
如是則吾夫子所謂惟天為大吾誰欺欺天乎之語亦  
未廣耶近世學者多流入于異端反以吾聖人之道為



小又以天為小而求其所謂大於虛無荒唐清淨寂滅  
不驗無實之間是之所謂大者非欺而何不謂賢者過  
之而亦為是說也大是饒舌及神游毗耶離城稽首丈  
室等語雖出於戲翰弄墨然先聖賢所不道六經所不  
載恐非先生長者為後學之訓未敢承教金華子之學  
亦雜於佛老至其讀和韓詩有想見大顛師不應談濯  
磨之句識者偉之聖道不明久矣諸儒不能無罪因高  
論雄文之及輒敢布其狂言十朋惶恐 右謹具呈左

奉議郎充集英殿修撰權發遣饒州軍州事王十朋劄子

王季海上恩帖

行書

淮竢罪機廷每慙無補上恩過厚延寘政塗懇免莫從夙夜震懼曲承雅養首遺慶緘感服之私非筆舌所既尚幸台照右謹具呈中大夫參知政事王淮劄子

范石湖垂誨帖

成大白蒙垂誨先夫人志中欲改定數處即已如所教

一一更竄添入久已寫下草子正以一兩處疑封題在  
書案數月矣而未敢遣一則今之所增贈典及諸孫及  
壻官稱姓名等皆是目今事而僕作志乃是吾儕在湖  
蜀時恐公點檢出來却是一病若不以此為病則可耳  
公可更細考而詳思之若有所疑即飛介見諭當即日  
面報不敢復如前日之遲徊二則本欲力拙自書而劣  
體日增倦乏不能如願不知吳興想不乏能書者就令  
朱書於石尤良便耳揮汗草草率略不罪不罪成大再

拜

范石湖金橘帖

成大蒙餉金橘三百枚荷意珍厚遲面叙感 右謹具  
呈十月日端明殿學士中大夫前建康府范成大

范石湖玉候帖

行楷書

成大頓首上問尊姪宜人玉候萬福十姐兒女輩悉布  
起居之禮朗娘侍奉均勝女甥甚難容聊慰目前也諸  
院安佳何時得至後堂耶新法玉麟春十斗并蠟鮓黃

崔各十瓶巴段四在伴書以瀆椒盤一笑一笑成大再拜

范石湖中流一壺帖

行草書

成大再拜上問二嫂宜人懿候萬福老嫂兒女輩悉拜起居之禮朗娘侍奉均慶元日四哥見過却云得大哥書近曾不快從善書又來為渠覓丹聞大段虛弱甚懸懸也四哥云得其姪書交之只批數字耳不知先之彼中曾得書否鍾醫捨我而它之亦緣貧病交攻可亮想

數曾相見如聞錢卿頗周其急可謂中壺也平江有委不也成大頓首再拜

范石湖春晚晴媚帖

成大維時春晚晴媚昨惟知郡中大旅食燕居台候神相萬福賢郎來辱惠書審問動靜且拜妙畫之貺併用慰感小隱自是益增輝矣邇者返漁樵粗支風露無足云賢郎具道公幹事委曲恨此荒寂不能効尺寸謾作鄭丈書致懇細與賢郎言之其它固似筆舌能既併須

續馳稟矣懇未知會并惟冀厚衛以前亨復慰此願望  
右謹具呈三月日中大夫提舉洞霄宮范成大劄子

謝昌國傾耳剴切帖

諤昨日承垂訪傾耳剴切之談執事如有遇其魏鄭公  
陸宣公之流亞乎更冀日究時用不患無特達之知也  
拙句漫資一笑區區尚容面詳 右謹具呈益夫宣教  
舊友三月三日朝散郎試右諫議大夫謝諤劄子

朱文公編輯文字帖

熹頓首拜覆竊聞卜築鍾山以便親養去囂塵而就清  
曠使前日之所整游而寄賞者今遂得以為耳目朝夕  
之玩竊計雅懷亦非獨為避衰計也甚善甚感所恨未  
獲一登新堂少快心目耳蒙喻鄙文此深所不忘者但  
向來不度妄欲編輯一二文字至今未就見此整頓秋  
冬間恐可錄淨向後稍間當得具藁求教也所編乃通  
鑑綱目十年前草創今夏再修義例方定詳略可觀亦  
恨未得拜呈須異時携歸請數日之間庶可就得失耳



末由承晤伏紙馳情熹頓首上覆

龔璠吳均楊溥金幼孜楊榮五跋俱見前

朱文公與姪六十郎帖

書呈朱六十秀才叔朝奉大夫致仕熹實封 八月廿  
日書報六十郎賢姪叔重人來得書知比日為況安佳  
足以為慰又聞有析居之擾想見諸事不易此即納祿  
又有嫁遣之累寔不可言想吾姪既無館地亦是此模  
樣無可奈何只得忍耐耳墓木摧倒此合與小七郎及

四九姪五四姪諸人商議打併若本位那得修莊固善  
然亦須吾姪同八十姪與衆人說過此不及一一作書  
也叔重人還附此草草餘惟自愛房下諸孫一一安樂  
埜必自有書諸兒女婦孫一一附問叔熹白

楊維禎錢惟善沈存端周伯琦陶九成五跋見前

朱文公賜書帖 行書

熹昨蒙賜書感慰之劇偶有小職事當至餘姚歸途專  
得請見人還撥冗布稟草草餘容面既 右謹具呈提

舉中大契丈台坐六月

缺

日宣教郎直秘閣提舉兩浙

東路常平茶鹽公事朱熹劄子

朱文公與時宰二手劄

行書

熹前者便中累奉鈞翰之賜去月末間拜啓略叙謝誠  
竊計已遂登徹繼此未遑嗣問下情但切瞻仰熹前所  
具稟減稅請祠二事伏想已蒙鈞念矣但延頸計日以  
俟賜可之報而杳然未有聞衰病之軀日益疲憊舊症  
之外加以洞泄不時兼旬未止兩目昏澁殆不復見物

如此作字但以意模索寫成其大小濃淡略不能知又以鄙性狹劣不能自覺簿書期會之間又不敢全然曠弛日夕應接吏民省閱文案若更旬月不得脫去即精神氣血內外枯耗不復可更支吾矣至于郡計空乏有失料理猶未暇以為憂也今有劄目申懇乞賜憐念二公之門不敢數致私書亦已各具稟劄託劉堯夫國正宛轉闕白矣論道之餘賜以一言俾得早從所欲實不能無望于門下東望拜手不勝祈扣之切伏乞鈞照

右謹具呈宣教郎權發遣南康軍事兼管內勸農事朱  
熹劄子

熹昨日道間已具稟劄到發偶有豪民不從教者不免  
具奏申省聞其人姦猾有素伏想丞相於里社間久已  
悉其為人特賜敷奏重作行遣千萬幸甚熹即今走三  
衢前路別得具稟次 右謹具呈正月十六日宣教郎  
直秘閣提舉兩浙東路常平茶鹽公事借緋朱熹劄子  
吳寬陳敬宗廖莊李東陽四跋俱見前

吳雲壑急足帖 行書

急足回收書忻審歲晏沍寒所履康勝示及告命已領  
良荷介注多感多感已專人為壽有懷併載前幅矣茲  
得以略踞上復壽甫觀使太尉賢弟 璵已附納

楊廷秀首夏清和帖 草書

萬里伏以首夏清和恭惟達孝宮使判府中大新拜祝  
釐高蹈事外天相台候動止萬福萬里素餐有箸亡補  
縣官未以罪乃庇焉所逮知感知幸尚遙良覲致幾盡

珍愛理即膺予環之寵 右謹具呈四月廿二日朝請  
郎守尚書左司郎中兼太子侍讀楊萬里劄子

陸放翁拜違言侍帖

行草書

游頓首再拜上啓仲躬侍郎老兄台座拜違言侍又復  
累月馳仰無俄頃忘顧以墅處窮僻距京國不三驛邈  
如萬里雖聞號召登用皆不能以時修慶惟有愧耳東  
人流殍滿野今距麥秋尚百日奈何如僕輩既憂餓死  
又畏剽劫日夜凜凜而霖雨復未止所謂交又已墮可

憂境中矣朱元晦出衢婺未還此公寢食在職事但恐  
儒生素非所講又錢粟有限事柄不專亦未可責其必  
能活此人也游去臺評歲滿尚兩月廟堂聞亦哀其窮  
然賦予至薄斗升之祿亦未知竟何如日望公共政如  
望歲也無階參省所冀以時崇護即慶延登不宣游頓  
首再拜上啓正月十六日

陸放翁與仲信明遠二帖

游頓首再拜仲信學士老友兄即日秋氣寢清伏惟尊



候神相萬福兒子婚事甚荷留念初正以吾輩氣類故  
敢有請已令媒氏具道其詳尚何疑哉今又蒙垂誨已  
抵龜而決矣餘令媒氏稟白自此遂忝瓜葛何幸如之  
羸薊控叙草草不宣游頓首拜仲信即省元學士友兄  
游頓首問闊頃叩甚至忽奉手帖欣重秋雨尊候輕安  
卿禪師遺墨甚妙恨見之晚輒題數行不足稱發颺之  
意皇恐得暇見過不宣游奉簡明遠老友 文字共四  
軸又五冊納去五派圖四軸數日前已就付來人去矣

游

文彭跋一則見前

卷三百九十五

六藝之一錄卷三百九十五

欽定四庫全書

六藝之一錄卷三百九十六

錢唐倪濤撰

歷朝書譜八十六

宋賢墨蹟

啓札

樓大防梅天雨潤帖

行書

鑰泣血再拜上啓叔清宣教親契兄坐前梅天雨潤伏  
惟聖室有相孝履支福鑰區區哀訴之悃已列前牘不  
復重陳母氏之喪比者蒙頒奠之渥且勤臨慰偶以負

土山間不及號訴歸見弟輩言之方欲尋便修謝忽又被專書心慰心感益增不敏之媿况門下遭艱無由一拜總惟乃荷周緻如此尤見崇篤之誼鑰老矣去歲積病之餘繼以大禍去死一髮苟延視息以圖大事已卜臘八舉葬得了此段則此身必不久於世遂將相尋於九京不敢自期於再見馮紙悲哽惟冀節宣以時前迓亨翥抉力不次鑰泣血再拜上啓叔清宣教親契兄坐前

真西山與王周卿手簡

德秀鄰牆久踈請見第切傾渴伏辱教汗深仞不彼第  
未承約束之前以宋令君為莆田簿求憲臺書致關陞  
之請已為作之矣今未可以再用是不果遵命非敢靳也  
先著作文集跋語旦夕頗得納呈併茲布及伏幾台照  
德秀頓首再拜上覆周卿學士座右

洪舜俞寄道場山釋法舟札

咨夔別後無日不病抱病應酬病愈甚猿鶴入夢屢矣

手帖來前雲氣猶濕恍然分半席旃檀林之下尉浣可  
量舊詩入石呈醜為多跋語非所敢當承朝家願移瓶  
錫於茂苑隨處結緣有何不可而力辭近時衲子謀窠  
座與干差遣同安知青菜根通天下只一般滋味靜退  
高風可勝欽仰盤陀花竹無恙大衆安隱六月八日咨  
夔皇恐上記舟公堂頭禪師 佳茗多感香杏仁一包  
試參之咨夔

與道場詩同卷法舟趙孟頫黃潛錢惟善法膺五

跋見前

魏華父昭代親友帖

行草書二紙關第一行

提刑提舉親家尊眷文所

關

文昭代親友兄弟間咸以諱

音來赴謂久痢所致謂八月四日午時又謂七月廿七

日得了翁書猶於枕間卧誦也吁何遽至此中興勲德

之家令子賢孫相繼零謝況於事變錯出人物眇然之

時而善人云亡關係匪淺豈惟一家之私諒惟孝思追

慕柴瘠弗任或又云九月廿四日卧喪車朝祖十月十

五日即寔了翁荷提刑知予愛憐誼均骨肉而疾不得  
候問死不及憑棺葬不及請後五溪之濱伶俜弔影迸  
涕交揮孰知此心也邇來親友道喪死喪不相赴始聞  
不審故審而後拜此亦未知伯仲自離荼毒體力何如  
心之憂乎靡所限極更惟彊飯節哀以終大事一門眷  
聚各計勝喪蓬州聞已開府石泉恐留江上或在東山  
亦坐不聞赴音之詳失於弔唁也妻孥附致問禮偶逢  
簡侂便就以薄奠侑之誄文並見別緘乞為薦陳不宣



謹狀了翁頌首再拜狀上機宜大孝賢伯仲姻兄服次  
十一月十七日

喬壽朋恐勤帖

行簡恐勤染報不敢覩縷少意拜稟女夫王太社儀今  
亡矣有少田土乃典物為人昏賴事已結斷乃復興訟  
據其幹人小人之姦詐欺孤如此望為詳酌而分明之  
小女亦不存無人照管仍乞免追其幹人是幸瑣細干  
括愧甚切幾台照 右謹具呈十一月二日少傅平章

軍國重事益國公喬行簡劄子

方秋厓濫塵札

岳皇恐端拜申稟岳濫塵府行矣解舟齋閣遽嚴莫下  
違離之拜端奉琅題重增翹企跋語非岳淺學者所敢  
僭下問如此當於舟中寫寄耳略此酌稟餘俟嗣音茲  
乞紆鑒 右謹具申呈三月望日文林郎新差主管尚  
書刑工部架閣文字方岳劄子

杜丞相薦勤帖

範已辱來翰前日奉答薦勤珍染示以先錄乃知程門  
師授學問淵源所以開悟後來者多矣讀之起敬來意  
良厚何可忘耶印歷已批但恨未瞻識耳略此奉復伏  
幾台照 右謹具申呈三月廿日朝奉郎右文殿修撰  
知寧國軍府事杜範劄子

張樗寮從者來歸帖

行草書

即之適間伏聞從者來歸喜欲起舞想見太夫人慈顏  
之喜可掬也野衣黃冠擁嬾殘煨芋之火不能亟謁已

拜墜染將比南珍行李甫息肩眷軫首及阨劣顧何以  
稱之敬須侍謝次令弟賜翰已領卽之拜稟殿元學士  
尊親契兄台坐 染物甚佳

張樗寮裴茗帖

行書

裴茗皆山中珍品拜祝感銘二文欲累以惡札深佩此  
意筆凍手龜恐未能卽承命也卽之和南大歇和尚老禪  
師侍者

張樗寮引年得謝帖

行書

即之引年得謝不負初心私竊自幸寓直中祕此朝家  
優老之恩以華晚節即之何者一旦得之恍不知其所  
自連日驚悸未寧也慶語手題非愛念之深何以有此  
感激感激即之叨承門蔭一生狷僻狷僻方始結局此  
身得以自由矣老兄知我者想亦為慶快也李三洲盛  
稱令弟律已少數字人多能言之但平日欠束斂謹重而  
或者不察其形而視其影耳少數字想未能即過我瞻企  
瞻企素餽甚佳即之再拜上覆致政朝奉老契坐右

刻工沈生在邑中否去令其來家醞四扱二色手甘三十真洞庭橘四十鱖魚鮓四缶金鉞裹烝一籃奉寄恐可供一酌即之

張樗寮溪莊帖

行草書

即之少意思溪莊幹去年納和糴米為平江攬納人侵盜已荷吾弟為之主盟更冀終惠事目見別紙即之致廿二弟知縣承議郎新除

蕭迂民與先之劄子

行草書

先之省狀元卿相迂民下辱臨顧獲奉從容方此懷人  
忽沐教墨開讀忻快跌折之苦幸喜勿藥蒙諭極荷不  
外且拜觀團酌高作審知門下有子如此可敬可喜但  
族間事力優裕者得至兩位如兩神童則自相琢磨不  
煩師資妙吉文昆仲則子弟皆幼且習他經至若螺溪  
諸周彼自芸人之田者也度未有可推輓處莫妨多為  
之圖他有所聞首及賢德政不在諄囑舊緒百千謾爾  
統上聊為湯藥之助輕鮮皇恐切冀笑留勿遽占復崖

約是愧并希台亮 右謹具申呈十月朝奉大夫主管  
萬壽道觀蕭迂民劄子

杜良臣勤顧帖

行楷書 蠟牋本

良臣連日荷勤顧老親昨日暑中令閤嫂嫂仍勞遠出  
尤感感專介至詢問醫者蓋猶未至也媽媽今日却已  
不甚熱然不敢投藥且喫粥糜今日且不勞見過候柴  
醫却相聞同商議投藥欲得中興登科記最後一冊檢  
朝貴家諱發劄子幸即檢付去僕一示餘容面對以究



草草希友亮良臣啓仲一哥新恩內除賢弟

陸君實羣玉帖

行草書蠟紙

秀夫拜覆義山尊兄長坐前秀夫比僭就羣玉府借至  
英光帖一本久留皇愧專此歸納切幸脉至深居詩帖  
久欲臨寫數紙而未能敢乞暫借數日常所用副墨之  
子姓某氏不煩候旨其來將有所委之也草草拜字它  
存侍竟不宣秀夫拜覆義山尊兄長坐前 蠲紙就  
覓一幅欲作籤題干煩皇恐秀夫

胡長孺仇遠二跋見前

文信公瑞陽帖

小行草書

天祥皇恩頓首

模糊數字

申侍讀尚書宏齋先生台坐前天

祥在瑞陽時嘗以一介人往候先生盤所先生錫之書教之以聖賢向上之學若天祥者雖非其人先生不鄙之蓋亦竊自啓發而不敢自為暴棄者也山林之日長學問之功深味前輩此語疑吏事妨吾學郡未一考被召除郎即丐香火以歸不從反得鄉節辭又不獲請不

得已任事往時臬司所職者才刑獄一項獨去春新有  
秤提又適值寇氛不靖添此二事而任大責重矣天祥  
以楮為本職第一事日夜劇切利病詳悉開諭百姓惟  
恐拂戾大概只以血忱至公風動境內未嘗專事刑威  
楮功之所以垂成也賴寇猖獗血江閩廣三路十數年  
於此天祥白手用兵丁萬人聲罪致討首尾三月寇難  
以平未幾天祥以先人本生母之喪即解印歸里里之  
羣不逞結為一譁喧動京師天祥遂因秤提得威虐之

劾未幾又謗天祥討捕之敗又謗天祥隱匿重服又裝點牆壁數其貪私不值一錢然後知鄉部之甚難而父母之國不可以行政也昔者吾宏齋先生蓋嘗為鄉漕矣其所以能鎮服一路者蓋出於宿德重望若天祥小生乍出其以召罵賈禍也固宜往議論瀕洞之初縉紳之號為知己者亦皆為紛紛所動不復見察訛以傳訛宜其成閹特先生當其時適在綠野凡天祥一時所行事先生得之閭閻耳目之近果如人言之太甚乎噫任

事之難尚矣真實體國以政事自見乃謂之生事謂之  
妄作而虛虛徐徐相招祿仕百事廢弛一切不問反竊  
愛根本卹人心之美名曾不知根本在楮人心在物價  
無財用何以聚人無政事何以立國奈何其是非顛倒  
之甚邪先生忠忱愛國者也憤世疾邪者也區區肺肝  
安得從先生一日傾倒求一語以自信茲者伏聞先生  
以新天子蒲輪東帛之勤為時一出自大司寇進長六  
卿典事樞顓政柄使衛武公之爵之德之齒千有餘載

之下煥然重光僕何幸身親見之天祥頓首為國賀為  
世道賀不獨為先生賀也天祥謗毀之餘賴君相保全  
無大督過束禮書入深林溫理故讀為吾所為蓋自是  
浩然方外之想矣先生即日膏澤六合僕也蓑笠太平  
與受公賜臨書馳仰神爽欲飛伏乞台照 右謹具申  
正月飲日承心制文天祥劄子

李時勉跋見前

文信公諸劄

一唐信臣不測有申述宜速應之或渠得章責捷劄即率二謝兵馳入城與之共守却欲報行數萬兵即下又在目矣

一諸處取到物色已有幾無對證無數證者固是難理矣如優令所共如前此項下有數目者即與爰行根究須斬犯法者數人然後取得起若肯納還者又可少寬其刑如平素省劄如印紙他們收得亦何用此納誥之人誥在其手則省劄印紙勅黃皆在焉

一徐姝同柳娘在劉千戶下傳佺已親之但缺榜不載  
想徐姝託以為別人女不直指為吾女也徐姝有夫可  
託其夫往贖幸圖之

一環娘十歲北中既無名想亦在民間此項須遍劄永  
丰諸隅物色方有出場

一在此無片楮可用費力費力全靠使司取些物色來  
靠舍弟與民章來有些少攜帶此外無策無策

一黃州周都統死於瑞金可惜可惜



一在瑞金時賤體一病甚可憂入汀以來幸已勿藥

一合家書與舍弟又一書達民章又一書達

缺

撫千戶

道達天祥皇恐拜筆十月八日發

一峰跋一則見前

口于謨兩兵帖

于謨頓首兩兵還

缺

想已達多日矣比建安使來方

得八月間所留一書亦足少慰老情即日冬晴緬惟佐政之暇所履勝常衰朽自春徂冬脾病不能入食形骨癯

瘠服藥無效今一切罷去安之以命亦自厭其餘生矣  
元素弟當能道曲折疲憊不復覩縷可細問之末由占  
晤千萬以時自厚不宣于謨頓首顯道通守朝奉友契

口讀賤息失教帖

讀悚恐再啓賤息失教先生肯幸臨灑掃延几杖豈宜  
少緩而迺爾悠悠真罪人比來屬老親為穿窬所擾尤  
更煎熬正擬揆日造請安海之召宜豈

原蹟宜  
豈乙轉

捨我以

殉切願勿渝夙諾今日雖岑寂未填溝壑尚冀有以効

區區也來日得暇一紆顧幸甚幸甚讀再拜

元賢墨蹟

啟札

趙魏公與覺軒六簡

孟頫連日甚欲一詣行館共談而人事絆之意未能去  
知罪知罪昨日蒙惠帖下徵惡札併前者同此奉納但  
竹石紙狹不可作且寫一詩續當為公作竹石也今日  
又有少事明日僭屈台重過此一飯切勿告阻至扣至  
扣遲面言敘不宣

孟頫近獲晤言甚慰數年契闊之懷方欲奉陪徜徉湖山間而微恙乃能阻之茲承惠字則知仙舟已解纜矣瞻望悵然惠及沙<sub>缺</sub>不至奪愛否秋氣著人途中厚自愛不宣

孟頫一節疎於上記遙想樓居仙人眺八極而自得唯有仰企而已人來得所惠書就審即日履候勝常為慰千萬承諭以令郎文書已一如來意見之行移旦夕當奉納也遠惠圓米細茶深叨厚意祇領感激無已草草具復寒煥朝暮冀惟善保不宣

孟頫久別傾渴無喻伏承惠書審文旃至止不勝欣慰  
蒙惠白米鵝麪茶果深見盛意祇領感戢無已台體所  
苦小爾今服何藥專尚詣使寓拜問併陳謝私也草草  
具復不宣

孟頫得旨暫還直以家事冗擾未能奉狀計惟即日文  
候勝常孟頫本為先人墓石未立所以觸熱來歸而石  
尚未得至殊焦煩耳湖州前錄事宣差今還宜興稅務  
提領在此為政甚平與敝家甚親今在貴里望吾兄照

觀幸幸因便奉記草草惟加察餘冀善護不宣

孟頫奉別甚久馳仰殊深去夏得旨南還日困塵事不  
得上記問候惟切傾企而已行次毗陵承專人惠書就  
審即日文候勝常慰不可言且蒙過愛特貽厚贐拜領  
豈勝感激舟中草草具荅漸遠惟慎護興息不宣 紉  
扇一握拜納付至李尚書墨竹即如來戒各題小詩其  
上甚愧塵浣畫軸極用皇恐皇恐望日謹空

倪瓚楊楨馬治三跋見前

趙魏公南谷二帖

孟頫頓首拜覆南谷真人尊師靜侍孟頫頃到殊勝甚  
擬得遂晤言然竟成交臂而失至今以為恨舊年廿六  
日還舍除夜來德清新歲二日忽路家遣吏見請三日  
急迴城中乃蒙隆福有書經之召今日至德清別墅明  
日即過杭詣省中計事數日間即走都下區區情事吾  
師所深悉政擬卜築溪上以為終老之計而情願未遂  
極令人徬徨兼居行乏力尤所甚憂感尊師欲寫石壁

間大字冀遣人至杭見教所書之文便當寫納但行役  
擾擾似不能一詣侍下以此為恨大不可言承惠篠至  
以為感所惠書著園人附航寄往城中乃成墨池敬勒  
手狀陳叙情素臨紙不勝馳神此行度已不能免然尊  
師有見教者是勿惜至意乃所望也餘冀萬萬珍重不  
備人日弟子趙孟頫稽首再拜林師來侍冀道意拙稿  
至今抄未成當令家下寄去也

孟頫稽首再拜南谷真人尊師侍者數日來苦腹疾不



果詣前問候不勝馳仰茲被誨帖惠以新冠領次感激  
無喻叔實不幸長逝昨日聞之為之痛傷聊以十兩奉  
之冀為轉達今晚還吳興不能詣別惟善保道體不宣  
孟頫再拜

趙魏公答子誠劄

孟頫頓首再拜知州相公子誠閣下孟頫去歲騎從來  
吳興因得畧吐久別之懷所恨貧家無可將接坐來簡  
慢知我最深必不見咎別後賤體老病交侵藥裹不離

左右者一年於茲獨坐空齋憤悶無聊子誠聞之必能  
見原耳他人前不欲道也茲承專价惠書就審履候勝  
常深以為慰承諭三皇廟碑及光福碑銘托愛如此其  
敢不書但恐筆墨蕪穢不堪上石耳漫爾書付去人更  
在裁之外蒙潤筆之贈子誠何必爾耶不敢引辭領次  
惶愧之極草草具覆餘惟上為國家下為吏民慎謹興  
息孟頫頓首再拜五月十九日

趙魏公丈人帖

孟頫上覆丈人節幹丈母縣君孟頫一節不得來書每  
與二姐在此懸思而已伏想各各安佳孟頫寓此無事  
不煩憂念但除授未定卒難動身恐二老無人侍奉秋  
間先發二姐與阿彪歸去幾時若得外任便去取也今  
因便專此上覆聞鄉里水滂想盤纏生受未有一物相  
寄二姐歸日自得整理一書與鄭月窓望逋達不宣六  
月廿六日孟頫上覆

趙魏公希魏帖

孟頫頓首希魏判簿鄉兄足下孟頫奉別誨言條爾兩  
歲追惟從遊之樂丹青之贈南望懷感未知所報惟是  
官曹雖閒而應酬少暇以故欲作數字道區區之情而  
不可得希魏愛我甚至當不以為謹也即日毒熱伏想  
水精宮中曩猶自得履候安勝孟頫賴庇如昨秋間欲  
發拙婦與小兒南歸以慰二老之思是時又當致書併  
以繆畫為獻也家間凡百悉望照拂因便奉狀不宣六  
月廿六日孟頫再拜

錢良右李皓梁子寅陸友仁王禮賓邱宗盧熊文  
璧諸跋俱見前

鐵鎖銀鈎到者稀鷗波亭上墨如飛後人何處求書  
法華表千年待鶴歸南陽張遜

餘不溪邊采白蘋鐵網珊瑚寸寸珍天上玉樓盛不  
住虹光夜夜貫星辰遂昌鄭元祐

書中苦說候除官客舍幽州六月寒近接阿彪歸後  
語婦翁強健縣君安吳僧嗣益

趙魏公與季統札 行草書

付至紙素索及惡書適有小幹至吳門未暇寫須伺吳  
門還乃可奉命却當寄僧判處附去外蒙口味之惠一  
皆珍物非厚意何以得此祇領感激無已英公惠椒深  
用佩戢會間冀道謝先此奉復餘伺後書新春唯加愛  
不宣十二月廿八日孟頫再拜季統山長秘書足下

趙魏公八年帖 行草書

孟頫再拜進之提舉友愛執事孟頫去家八年得旨暨

還何圖酷禍夫人奄棄觸熱長途護柩南歸哀痛之極  
幾欲無生憂患之餘兩目昏暗尋丈間不辨人物足脛  
痠痺行步艱難亦非久於人間者承專价惠書遠貽厚  
奠即白靈几存沒哀感託交廿年餘蒙愛至厚甚望吾  
友一來以叙情苦而又不至懸想之情臨紙哽塞不具  
七月四日孟頫再拜進之提舉友愛執事

趙魏公遠顧帖

行草書

孟頫頓首國賓山長人英坐右近承遠顧媿不能款曲

別後極深鄉仰茲得惠帖就審即日履體侍奉清適殊  
以為慰發至餘縣何必爾耶領次益增愧感草草具答  
不宣孟頫再拜十六日

趙魏公舟從枉顧帖

行書

孟頫再拜萬戶相公尊親家坐前孟頫頃承舟從枉顧  
邱園自惟貧家無以將接至今以為媿別來伏計尊履  
勝常孟頫三月間還城中賴庇苟安而已衛竹所入道  
為中山建道院持疏門牆得蒙慨然至幸至幸前者欲



從蓼塘回舊花竹戴勝已得許諾又張萬戶處有洛神賦後節二者併望用情求至不勝拜賜不宣四月廿五日孟頫頓首再拜

趙魏公心腹帖

行草書

孟頫頓首晉之足下數日來心腹之疾大作作惡殊甚令親至得所惠書知安養為慰不可言付至西洋布及捐惠諸物一一拜領感激無喻負印冀用情昨仲美以為必可得望以下意祝仲美委曲成就為佳沈提領處

綾亦望催促令親帶來紙素緣情緒不佳不能盡如來  
戒千萬勿訝人還草草具答餘惟珍重不宣十一日孟  
頴再拜

趙魏公風采帖

行書藍箋

孟頴再拜堊堂提舉友舊執事孟頴不望風采恍不記  
時僧來得所惠書道舊如夢其慰何可勝言且承諄諭  
俾書先安人墓石極仞不鄙既嚴命所臨又有景亮之  
囑即已如戒寫付去僧但恐筆札荒蕪恐不可用以上

石然景遠學士之文自可傳遠也外承潤筆之惠尤佩  
厚意感激感激草率具答不宣孟頫頓首再拜

趙魏公懷想帖

行書

孟頫書致明遠提舉賢弟坐右孟頫別來每切懷想極  
寒計惟動履勝常茲有柔毛一牽牟粉十封朱橘一棣  
蜜果十桶專僕馳納聊見微意一笑留之幸甚不宣孟  
頫書致

趙魏公遠賜帖

行草書

孟頫頓首上記教諭聘除賢親坐右孟頫頃承遠賜枉  
顧至以為感別後伏計文候勝常近者王宅親事專屈  
郎總管為掌判旬日前方來茲專托其代伸區區就有  
金魚十尾荔子一椀柔毛一牽年粉十石聊見微意笑  
留幸甚霜晴惟盡珍重理不宣十一月十一日孟頫頓  
首上記

趙魏公鄉人莘昇帖

行書

孟頫記事頫首再拜廉訪監司相公兄閣下孟頫近拜

答後伏想日來體候勝常孟頫託賴親愛僭越有稟鄉人革昇昨因事革閒今欲援再叙例告狀望吾兄以孟頫之故特與主張改正如小弟受賜也比由會晤善保尊重不宣九月十五日孟頫記事頓首再拜廉訪監司相公兄閣下

趙魏公與中峰十一帖 附管夫人一帖

中峰和尚吾師侍者孟頫和南謹封

趙孟頫印 朱文蓋  
題名十

一帖封  
署俱同

孟頫和南拜覆中峰和上吾師侍者孟頫歸自吳門得  
所惠字審道體安隱深慰下情示諭陳公墓志即如來  
命寫付月師矣送至潤筆亦已祇領外蒙誨以法語尤  
見愛念即與老妻同看唯有頂戴而已此番杖錫恐可  
還山中瞻望白毫不勝翹想不宣弟子趙孟頫和南拜  
覆 月師云吾師近到敝舍而弟子偶過吳門不得一  
見不勝悵然

孟頫和南再拜中峰和上老師侍者孟頫汨汨俗塵中

每蒙尊者不棄時時賜問顧惟何者乃辱過愛如此當  
亦是前世有緣故耶近一病兩月幾至不起得鮑君調  
理方似小差然眠食未復常氣力憊憊憂之深至於死  
生之說師所謂委順者固已知之矣感師提誨情何敢  
忘蒙寄惠酒豉粒粒皆是禪味敬領莫知所報阿孫迴  
草草道謝春深猶寒山中當益甚惟珍重珍重不宣孟  
頴和尚再拜廿四日 良侍者前蒙惠藥甚濟所乏冀  
為道謝

弟子趙孟頫和南拜覆中峰和上老師侍者近數有人  
自山上來知道體安隱慰不可言茲有少稟瀆杭州報  
國寺在舊內中棟宇極大去歲九月火災止存三門猶  
足稱雄於諸寺近笑隱訢老住持欲求大和上信筆草  
一疏渠欲持以為興復之計弟子與訢老有文字之交  
故敢干聒方盛暑中求法語者無數度老師必大厭之  
而孟頫又復有請亦恃慈悲故耳唯恕之而曲從之幸  
甚感甚餘惟珍重珍重不備弟子趙孟頫和南 六月



廿一日

弟子趙孟頫和南上記中峰和上老師侍者孟頫得旨  
南還何圖病妻道卒哀痛之極不如無生酷暑長途三  
千里護柩來歸與死為鄰年過耳順罹此荼毒唯吾師  
慈悲必當哀憫蒙遣以中致名香之奠不勝感激但老  
妻無恙時曾有普度之願吾師亦已允許孟頫欲因此  
緣事以資超度不審尊意以為何如又聞道體頗苦渴  
疾不知能為孟頫一下山否若仁者肯為一來存歿拜

德不可思議以中還謹具拜覆哀戚不能詳悉併祈師  
照不宣弟子趙孟頫和南上記六月十二日

弟子趙孟頫和南拜覆中峰和尚師父侍者孟頫自老  
妻之亡傷悼痛切如在醉夢當是諸幻未離理自應爾  
雖疇昔蒙師教誨到此亦打不過蓋是平生得老妻之  
助整卅年一旦哭之豈特失左右手而已耶哀痛之極  
如何可言過蒙和上深念遠遣師德賜以法語又重以  
悼章又加以祭文亡者得此固當超然於死生之塗決

定無疑至於祭饌之精又極人間盛禮尤非所宜蒙歿  
存感戢不知將何上報師恩雖亡者妄身已滅然我師  
精神之所感通尚不能無望於慈悲拯拔俾證菩提此  
則區區大願因俊兄還山謹此具復臨紙哽塞不知所  
云六月廿八日弟子趙孟頫和南拜覆中峰大和上師  
父侍前

弟子趙孟頫和南再拜中峰大和上老師侍者昨以中  
還山草草具字陳叙下情茲承嘉上人下訪特蒙惠書

審即日道體勝常深用為慰又知以中十七日方登天  
目所謂普度功德此乃先妻願心必須為之但日期未  
敢定臨時又當上稟耳海印雖有登山之約然亦未可  
必外承指示卅年陳迹宛若夢幻此理昭然夫復何言  
但幻心未滅隨滅隨起有不能自己者此則鈍根所障  
亦冀以漸消散耳圓覺經尚有三章未畢一得斷手便  
當寄上又恐粗惡不堪入板然唯師意秋暑不欲久滯  
嘉兄暫此具復餘惟盡珍重理不宣孟頫和南再

拜中峰大和上老師侍者廿三日

弟子趙孟頫和南再拜中峰和上老師侍者以中來得  
兩書披讀如對頂相感激慈念不覺淚流蓋孟頫與老  
妻不知前世作何因緣今世遂成三十年夫婦又不知  
因緣如何差別遂先棄而去使孟頫栖栖然無所依今  
既將半載痛猶未定所以拳拳欲得師父一臨以慰存  
歿之心耳今蒙諭以病惱之故弟子豈敢復有所請賜  
教普度榜文情旨仰見慈悲此事度葬事以前必不能

辦一則事緒紛忙二則氣力難辦已與以中子細商量  
直伺東衡房屋完備就彼修設庶望山靈川祇方隅禁  
忌亡者神識寬親之等皆霑福利耳想老師亦必以為  
然也聞老師有疝氣之疾已寫方與以中恐可服也謹  
此拜覆圓覺俟再寫納併乞清照弟子趙孟頫和南再  
拜中峰和上老師侍者

弟子趙孟頫和南拜覆中峰大和上尊者尊前孟頫近  
者拜書謝丹藥之惠言不盡意想蒙深察雨後漸涼山

中氣當已寒伏惟道體安隱孟頫自先妻云亡凡事罔  
知所措幸得雍子種種用力稍寬焦煩兩日來覺眠食  
粗佳但衰年無緒終是苦惱小兒時去東衡營治葬事  
畧有次第擇九月初四日安厝勢在朔旦日起靈區區  
欲躬詣丈室拜屈尊者為先妻起靈掩土亦想師父尋  
常愛念之篤懃懃授記先妻於師父所言所惠字所付  
話頭未嘗頃刻忘今日至此寔是可憐師父無奈何只  
得特為力疾出山庶見三生結集非一時偶然會合之

薄緣耳弟子本當親去禮拜而老病不可去欲令小兒去又以喪葬事繁萃於此子又去不得故專浼月師兄代陳下情唯師父慈悲必肯為弟子一來若蒙以他故見拒則是師父於亡妻不復有慈悲之念而有生死之異也孟頫復何言哉臨紙不勝哀痛涕泣俟望之至不備八月廿二日弟子孟頫和南拜覆中峰大和上尊者尊前

孟頫和南上覆中峰和上老師侍者孟頫紛紛塵事中



不得以時上狀惟極馳嚮漸熟伏計道體安隱五月十日老妻忌辰一如前議命千江菴主主持了普度一事只作一晝夜日誦法華夜施十燈十斛兼三時宣禮法華懺法區區不敢祇屈尊重敢乞慈悲就山中默加觀想庶使無情有情及亡者俱獲超度孟頫拜德豈有已哉因幻住道者上山謹附短狀餘惟珍重珍重不宣大拙以中來侍併冀道及下意四月廿六日弟子趙孟頫和南上覆中峰和上老師侍者

孟頴和南拜覆中峰和上老師侍者孟頴千江入城得  
誨帖乃知杖錫以籃輿入山益深聞之甚為驚嘆頃時  
時有人持法語見過每以人不識好惡與從孟頴求書  
者無異是與不是必要滿幅盈卷問其所以莫知好處  
安在徒使人終日應酬體疲眼暗無策可免雖吾師道  
大語妙不可以此為比然其疲於應接亦豈不然耶和  
上既已入山在孟頴輩便未有望見頂相之期為之悵  
然殆不容說又先妻無恙時

原蹟時  
字旁注

曾有普度之願滿

擬和上一到東衡爲了此緣今既不然只得請千江主  
其事若其他人孟頫殊不委信想和上亦以爲然也聞  
有便草草具覆臨紙不勝馳情之至山深林密地多陰  
濕惟冀珍重珍重不宣弟子趙孟頫和南拜覆四月十  
二日

弟子趙孟頫和南再拜中峰和上老師侍者孟頫政以  
久不上狀側聞苦瘡痍之疾深助耿耿而賤體亦爲老  
病所纏眠食日減畧無佳况大拙來收兩書第二書報

以中示寂不覺失聲蓋平生荷以中至為相愛今其長往固是無可深悲但人情世諦自不能已耳和上年來多病恐亦不必深惱人誰無死如空華然此不待弟子言也惠茶領次知感因大拙還草草具答時中惟珍重之祝不宣弟子趙孟頫和南再拜閏月廿日

管仲姬與中峰帖

道昇和南拜覆本師中峰和尚大禪師法座前道昇拜別頂相動是數載瞻仰之心日積不忘年時得以中首

座來都如見師父尊顏備審道體清安甚為慰喜道昇  
手書般若經報薦先父母深恩及救薦亡兒女輪迴之  
苦極感謝我師大發慈悲點化亡者皆得離苦海我師  
但起一念何獨道昇公姑父母兒女得生淨土一切法  
界含靈皆成佛道盡證菩提矣道昇粉骨碎身生生世  
世報答我師大和尚慈悲深恩也道昇疊蒙賜書知前  
年吾師所惠書及錄題經讚法語寄來至今並未曾收  
得不審當元何人送去聞知快快道昇一面作書於家

間問舍姪去也去歲以中送去般若經五卷又蒙本師慈悲展讀點化又各得題讚存歿重感我師道昇宿業甚重每日人事擾擾不能安靜長想我師慈悲指教尋思話頭但提起終得受用道昇與良人誠心至願但得到家只就家庭修設拜懇本師大和尚大發慈悲普度一切鬼神一切有主孤魂一切無主孤魂一切冤親良人與道昇祖上父母兒女外祖妣奴婢及一切法界含靈莫墮三塗惡苦願皆得早生佛界此乃良人與道昇

心願已託以中兄先覆知師父大和尚今春僕回又拜  
吾師惠書及心疏道昇等拜觀如心如願良人見之生  
歡喜心尤增感佩我師如此大發慈悲度脫一切衆生  
是道昇等七世父師之恩何以報謝深恩今因的便特  
拜此書報安更乞善保愛不宣六月初七日女弟子管  
氏道昇和南拜覆

趙孟籲釋允寧祝允明楊循吉董其昌六跋見前  
趙仲穆復四窓札

趙雍和南復書四窓講師道契兄座下雍別後不得修書問動靜而自杭來者每蒙寄聲皇恐感激無物足喻人至得翰墨就審道體安隱慰不可言又有遠眴乳果尤增感戢但惡札不足稱清致耳謹奉復書未間唯冀盡消息理不具備趙雍和南復書

趙仲穆所惠翰墨帖

趙雍頓首再拜復書彥清相公尊契兄閣下近因成伯

貞郎中便才

旁添十七日早四字

方附左轄一書兄長一書午後




李總領來領所惠翰墨備悉意雅不意慶門凶變伏審  
老相公棄背榮養驚悼不能自己恭惟孝心純至哀痛  
奈何奈何即當躬詣靈幃申一慟之敬奈卒未可言還  
弗克如願歸日專謁門牆以請不敏之罪茲因李總回  
謹奉書唁伏冀節哀以襄大事不備趙雍頓首再拜

趙彥徵與衡唐札

行草書

今早擬欲專造緣執事昨晚云大尹兄到敝舍所以不  
果而專俟舟從之來臨耳不然安敢坐待以速罪也伏

希情恕不具趙麟拜啟衡唐徵君先生



六藝之一錄卷三百九十六